

PM: Kerajaan tidak bermaksud belakangkan ekonomi kaum2 lain

UM 29 NOV 1962

PULAU PINANG 28 Nov. — Datuk Sri Dr. Mahathir Mohamad menegaskan hari ini kerajaan tidak langsung bermaksud belakangkan ekonomi kaum-kaum lain sekalipun ia secara terbuka menjalankan berbagai usaha membantu memajukan ekonomi bumiputera di negara ini.

Perdana Menteri berkata, langkah itu bukan semata-mata satu usaha untuk memperkayakan bumiputera tetapi ia adalah satu peranan yang perlu dilaksanakan untuk mengseimbangkan kedudukan ekonomi antara kaum di negara ini.

Ini, tambah beliau, kerana kerajaan terus menghayati tujuan di sebalik penggabulan Dasar Ekonomi Baru bahawa perasaan irihati antara kaum tidak akan luput selagi kedudukan ekonomi

antara mereka tidak seimbang.

"Perasaan irihati yang tidak sihat inilah yang akan dapat mencetuskan berbagai masalah seperti pergaduhan kaum yang pernah berlaku pada tahun 1969 dulu, katanya, ketika berucap merasmikan bangunan II tingkat Dewan Perniagaan dan Perusahaan Melayu cawangan Pulau Pinang di sini hari ini.

Datuk Sri Dr. Mahathir menjelaskan, jika kerajaan tidak begitu memberi bantuan kepada kaum-kaum lain ini semata-mata kerana mereka sudah matang dan mahir dalam selok-belok perniagaan.

"Tetapi ini tidak bermakna kerajaan belakangkan ekonomi kaum-kaum lain," ujarnya. Sebaliknya, kata Perdana Menteri, kerajaan sentiasa menyedari hakikat bahawa

bumiputera baru sahaja menceburkan diri dalam bidang ini di mana pengetahuan mereka tidak begitu mencukupi untuk menentukan kejayaan mereka.

Serentak dengan itu, di samping usaha-usaha yang dijalankan oleh kerajaan, beliau berharap pihak Dewan Perniagaan dan Perusahaan Melayu sama ada di peringkat pusat atau cawangan-cawangan negerinya memainkan peranan dalam usaha mencapai matlamat yang diharapkan.

Menurutnya, dewan itu dapat menjalankan berbagai usaha seperti mengumpul pendapat di kalangan peniaga-peniaga bumiputera, menganjurkan kursus, memberi panduan, tunjuk ajar berniaga, mencari peluang perniagaan dan sebagainya.

Dalam hubungan ini, Perdana Menteri menasihatkan supaya dewan itu jangan bertindak di luar matlamat asalnya seperti menubuhkan syarikat-syarikatnya sendiri.

Katanya, jika perkara seumpama ini berlaku ia mungkin akan menguntungkan segolongan ahli-ahli jawatankuasa serta membangkitkan berbagai tuduhan yang tidak sihat dan tidak memberi faedah kepada semua ahli serta perniagaan bumiputera.

Beliau berkata, dewan-dewan perniagaan hanya boleh menganjurkan penebuan syarikat-syarikat tetapi tidak diletakkan secara langsung dalam organisasinya.

Menyentuh tentang cadangan Dewan Perniagaan dan Perusahaan Melayu cawangan Pulau Pinang hendak mengadakan satu tabung amanah untuk menghantar anak-anak bumiputera mempelajari kemahiran dalam bidang pembuatan, Perdana Menteri berkata, ia tidak menguntungkan jika mereka tidak diberi latihan dalam bidang pengurusan juga.

Oleh itu, beliau berharap pihak dewan-dewan perniagaan bumiputera dan pihak-pihak berkenaan akan memberi perhatian yang berat dalam aspek ini agar matlamat yang diharapkan dapat dicapai.

Menyentuh tentang bangunan Dewan Perniagaan dan Perusahaan Melayu Pulau Pinang yang dirasmikannya itu, beliau berharap ia tidak sahaja menjadi lambang yang hanya untuk dimegahkan oleh bumiputera di negeri ini sahaja.

Tetapi, katanya, bangunan itu hendaklah menjadi satu pusat yang benar-benar dapat memberi sumbangan dalam memajukan bumiputera negeri ini dalam bidang ekonomi.

Beliau juga menisfatkan usaha dewan itu membina bangunan bernilai \$9 juta di kawasan yang strategik di Pulau Pinang itu sebagai satu kejayaan cemerlang yang wajar dicontohi oleh dewan-dewan perniagaan bumiputera negeri-negeri lain.

Perdana Menteri berkata, dengan adanya bangunan yang tersergam indah seperti ini ia akan lebih menyasarkan lagi peniaga-peniaga lain sama ada dari dalam dan luar negeri mengadakan usahasama dengan mereka.